

Konferencija povodom obilježavanja pete godišnjice Vijeća za regionalnu saradnju, 27.02.2013.

“Pet godina Vijeća za regionalnu saradnju: gradimo na temeljima, u susret novim izazovima”

Govor ambasadora Kierana Dowlinga

Generalni sekretaru Svilanović, kolege panelisti, cijenjeni gosti, dame i gospodo,

Čast mi je što večeras ovdje predstavljam irsku.

Imam dvostruku dužnost, jer Irska nije samo članica Odbora RCC-a, kojeg podržavamo još od njegovog osnivanja, nego trenutno predsjedavamo i Vijećem ministara EU.

Budući da smo ostrvska država, naše iskustvo u regionalnoj saradnji je malo više fokusirano – naš region uključuje samo nas i Ujedinjeno Kraljevstvo –ali i sveobuhvatnije – jer se također smatramo dijelom evropskog regiona. Upravo nam je članstvo u Evropskoj uniji pomoglo u prevazilaženju sukoba unutar našeg skućenijeg regiona.

Ove godine obilježavamo 40. godišnjicu pristupanja Irske Evropskoj uniji, u okviru prvog kruga proširenja Unije. Evropska unija možda predstavlja zlatni standard kada se radi o regionalnoj saradnji. Ona je uspostavila nivo saradnje među zemljama koji je do tada nezabilježen u historiji. Ta saradnja je omogućila EU da postane najuspješnija snaga za demokratizaciju i mir u današnjem svijetu. A kada su mir i sigurnost uspostavljeni, može uslijediti veći prosperitet.

Upravo je naše članstvo u regionalnoj grupi koja nosi naziv Evropska unija poduprlo transformaciju Irske iz male ostrvske zemlje na periferiji koja jako zavisi od trgovine sa najbližim susjedom u jednu zrelu, liberal-demokratsku državu sa jakim vezama sa evropskim i globalnim partnerima, koja uživa međunarodno poštovanje zbog svog sućutnog i principijelnog traženja sigurnijeg i pravdenijeg svijeta.

Saradnja svojstvena EU također je odigrala važnu ulogu u osiguravanju mira u malom regionu Irske i na našem ostrvu.

Zajednički rad sa drugim zemljama u evropskoj areni omogućio je i Irskoj i Ujedinjenom Kraljevstvu da postignu novi, zreliji međusobni odnos, kojim ne dominira prošlost. Vidim da se i u regionu Balkana razvijaju slični odnosi, gdje saradnja na praktičnim pitanjima, kao što je izgradnja puteva ili povećanje nivoa ulaganja, može pomoći u izgradnji odnosa koji su fokusirani na buduće koristi, a ne na sukobe iz prošlosti.

Iako je balkanski region veoma različit od Irske i UK u kulturološkom, geografskom i historijskom smislu, vidim da se i ovdje pojavljuje mnogo istih trendova u oblasti saradnje koji su i nama donijeli plodove. Najvažniji od tih trendova je upravo prilika da se sastanu predstavnici različitih zemalja i razgovaraju o zajedničkim pitanjima i problemima i traže rješenja za njih. Parlamentarna saradnja predstavlja posebno važan aspekt sve bližeg odnosa između UK i Irske, i znam da je njen značaj na sličan način priznat i u okviru mandata RCC-a, koji uključuje parlamentarnu saradnju kao krovnu temu koja svojim djelokrugom povezuje sve te oblasti.

Upravo je važnost regionalne saradnje u promoviranju mira, stabilnosti i prosperiteta razlog zbog kojeg je Irska članica i nastavlja podržavati rad RCC-a. Mi smo gorljive pristalice proširenja Evropske unije. Dugoročno podržavamo evropsku perspektivu zemalja Zapadnog Balkana. Radom RCC-a pomaže se onim zemljama koje će tek pristupiti EU da ispune kriterije iz Kopenhagena. Vjerujem da je posebno korisno to što RCC pruža jedinstven forum kojim se omogućava razmjena iskustava među članicama EU i zemljama koje su na putu ka članstvu.

Rad RCC-a također povezuje generalnu temu predsjedavanja Irske. Kao što možda znate, teme našeg predsjedavanja su stabilnost, radna mjesta i rast. Tokom irskog predsjedavanja, zemlja koja je u oporavku pokreće oporavak u Evropi. Iako su u programu našeg predsjedavanja detaljno navedeni zakonodavni i drugi prioriteti u pogledu svih formacija Vijeća Evropske unije, može se ukratko reći da su najvažniji prioriteti:

- Osiguravanje stabilnosti
- Ulaganje u održiva radna mjesta i rast
- Evropa i svijet, a posebno značaj gledanja izvan vlastitih granica i saradnje sa globalnim partnerima

Proširenje EU je ključni dio programa našeg predsjedavanja i njegove teme. Politika proširenja ostaje najefikasniji instrument EU u podržavanju reformi i procesa transformacije širom Evrope. Usvajanjem vrijednosti EU na Zapadnom Balkanu i u drugim zemljama aspirantima osigurava se *stabilnost* i neopoziva politička reforma. Tu su i očigledne ekonomske koristi u formi većeg zajedničkog tržišta, što podrazumijeva *radna mjesta* i ekonomski *rast*, i za EU i za njene nove i buduće članice. Konačno, ova politika doprinosi i našoj sigurnosti i prosperitetu.

Hvala vam.